



Komunikadu Imprensa
Tribunál Distritál Dili
27 Juñu 2014

Tribunál absolve arguidu ba krime violasaun seksuál tanba la iha evidensia sufisiente

Iha 24 Juñu 2014, Tribunál Distritál Dili prezide leitura akordaun no absolve arguidu LA husi krime violasaun seksuál ne'ebé akontese iha 8 Setembru 2013, iha Distritu Ermera.

Ministériu públiku akuza katak iha 8 Setembru 2013, arguidu hakoak lezada, ho forsa buti lezada nia orgaun seksuál, no taka metin lezada nia ibun, nune'e lezada la bele hakilar. Depois ida ne'e, arguidu hasai lezada nia rounpa no halo violasaun seksuál hasoru lezada. Arguidu ameara lezada atu labele hatete sai saida mak nia halo ba lezada, selae arguidu sei oho mate lezada. Arguidu ataka lezada wainhira lezada ba hili ai-maran. Lezada foin mak halo tinan 15 wainhira krime ne'e akontese.

“Mesmu JSMP kumpriende katak prova mak bele hametin konviksaun juis atu elabora sentensa, JSMP preokupa tanba tribunál la konsege konsidera sirkunstansia importante balun hanesan lezada nia kapasidade atu asegura evidensia no amiasa ne'ebé akompaña ho presaun ne'ebé arguidu halo depois nia komete krime ne'e”, dehan Diretór Ezekutivu JSMP, Luis de Olivera Sampaio.

JSMP subliña katak defisil teb-tebes ba vítima violénsia seksuál sira ne'ebé hela iha áreas rural no isoladu atu kumpriende diak kona-ba rekizitus legal sira hanesan relatóriu mediku hosi ospital. Kazu ne'e difisil liu ba vítima tanba vítima hetan ameara hosi arguidu no ameara ne'e rezulta vítima la iha opsaun atu buka apoiu hosi ema seluk. JSMP hanoin katak desizaun ne'e la reflète difikuldade sira ne'e no falla atu proteje vítima, liu-liu labarik sira hosi violénsia seksuál.

JSMP mós preokupa ho konsiderasaun juis nian ne'ebé kestiona lezada nia virjem iha audiénsia. JSMP subliña katak ne'e la'os kestaun kona-ba vítima lakon nia virjem, maibe vítima hetan violénsia seksuál ho ameara no forsa. Wainhira tribunál konsidera kestaun ne'e atu halo desizaun, ida ne'e kestaun ida ne'ebé tenke foti nu'udar preokupasaun sériu kona-ba desizaun ida ne'ebé justu.

Iha kazu ne'e, Ministériu Públiku akuza arguidu kontra artigu 172 Kódigu Penál kona-bá violasaun seksuál konjuga ho artigu 173 Kódigu Penál kona-bá agravasaun.

Iha audiénsia julgamentu, arguidu rekuza akuzasaun husi Ministériu Públiku katak nia la halo violasaun seksuál hasoru lezada.

Iha parte seluk, lezada deklara katak nia lakon nia virjem no sofre kanek iha orgaun seksuál. Mesmu nune'e, lezada bele la'o ba eskola no fila ba uma no liu tiha lora tolu mak lezada foin ba halo keixa iha polísia.

Tribunál konsidera katak faktu sira iha akuzasaun no depoimentu husi lezada hamosu duvida tanba laiha relatóriu médiku, nune'e tribunál decide hodi absolve arguidu husi kazu ne'e.

Iha kazu sira hanesan ne'e, investigasaun tenke halo kompletu atu evita kazu ne'e bazeia loos deit ba lezada nia depoimentu. Ba razaun ne'e, JSMP hanoin katak vítima violasaun seksuál tenke hetan asisténsia legal apropriadu no ministériu públiku tenke investiga kazu sira ne'e ho kompleteitu atu hetan evidensia ne'ebé forte. JSMP husu ba ministériu públiku atu konsidera hodi apresenta rekursu hasoru desizaun ba kazu ne'e.

JSMP mós rekomenda ba tribunál atu konsidera sirkunstansia estrordinariu sira ne'ebé dalabarak la konsege formaliza tuir rekeztu legal sira, tanba kontestu no realidade sosial ne'ebé dalabarak ses dok hosi kapasidade lejislaadores sira atu formula situasaun sira ne'e iha lei.

Kazu ne'e rejista iha tribunál ho Nú. Prosesu:130/2014/TD Dili, representa juis kolektivu ba prejide leitura akordaun Dr. José Maria de Araújo. Ministériu Públiku representa husi Dr. Ambrosio Rangel no arguidu hetan defeza husi Dr. José da Silva husi Defensória Públiku.

Atu hetan informasaun kompletu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone:3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPtl